

精刊

吳摯甫尺牘

國學扶
輪社

吳摯甫尺牘卷二

上

答姚慕庭

戊戌三月二十三日

昨得仲實書知近調南漳想漸入勝地老福故自昌大也仲實以洋人行教甚多為累此事幸勿大意往來須有禮貌其人多聞見有學識其教以愛人謙遜求改過為要此亦何惡於人而地方官吏乃欲墨守舊見深閉固距以致激成事變而國以危亡隨其後此何為者耶往年四川全省滋事獨黎尊齊川東道屬下無一教案西人感而頌之尊亦無他謬巧不過西人往來過夔府者尊齊以禮接待治酒食以款洽之而已而其效已能使屬境無教案故凡滋事之處皆官長激成之也膠澳去則大事已去分割之勢已成而其肇衅之始則由教士被戕此盜賊所為非官之過然推其來由則李鑑帥不接待西人牧令揣摩風氣西人積不能平故一

發莫制如此豈不傷哉望我公為國下心稍宏偉度也吳刻古文辭類纂元板已燬近欲集貲付印曾文正公一生佩服惜抱先生於其自作之文尚有趣向乖異之處獨於此書則五體投地屢見於書札日記及家書中中國斯文未喪必自此書以自漢至今名人傑作盡在其中不唯好文者寶畜是編雖始學之士亦當治此業後日西學盛行六經不必盡讀此書決不能廢而康本孤行又復翻板以吳刻校之實有雅俗之別此乃公家舊物鄙意欲求多分鶴俸勉入數股以為之倡可乎

答柯鳳孫

同日

接二月來書具承一一久不裁答者以子翔云有尊疏底本而久未見寄欲讀過再奉復也昨經子翔寄到大致平適其謂聶軍兒戲亦誠有之獨保薦董福祥仍是耳食董福祥至今軍中尚操練

白蠟杆子其為兒戲殆又甚於聶軍政府倚此人為大樹孟浪已極而尊疏亦推薦之此其識亦何以加於政府哉柄臣誤國一疏想不輕以示人未知偉議何如耳

與方劍華

閏三月二日

別後未識何時長揖軍門至為懸系北洋海口盡為遠鄰分據我無斗水寸土何以自立論者動稱法祖我祖宗艱難辛苦櫛風沐雨所得土地乃今不甚珍惜朝割一地夕送一圖遂使沿海要害之郡盡歸勦敵祖宗成法顧如是乎董尚書威稜遠讐移節正定拱衛京輦筦鑰之任非公莫屬其如何變舊為新翳我公是望

答河南額方伯

同日

某閉門教授理亂不聞似聞北洋海口盡為強鄰所踞近今各國

疆界以管轄海里多寡為強弱若吾國三邊際海北海尤為畿輔門戶今至勃碣海隅無升斗之水可以自擅尚何以自成為國此誠謀謨諸公之計左也廟謨專講遜讓封疆之吏縱赤心為國勤求吏治何能裨助萬一乎元老盈廷衮職無關寒儒跼伏何用浪愁惟有溫習舊書稍用遣憤

與山西胡中丞

閏月六日

拜送旌麾迭更年籥遠聞威望氣勢一增聞從各報中獲讀先後大疏具仰蓋畫淵深變通盡利山右自中國視之殆是貧瘠省分而外國則視為至富之國非宏材通識豈易創興大利但惜執政不明外情好以舊議牽制任事者籌策不令一事順成最可浩歎日本鐵路費絀遣人至英招股而吾國開鑛修路必嚴禁外人入股豈非過慮也哉至海疆要害則又隨人指取一何真倒輕重至

此今山東鑛利路工已舉而拱送他人矣長此不變吾恐執事功業未及就而山西鑛利路工又將斂手讓人也奈何奈何今他不見作為惟董軍移屯正定顯露西遷微怕誰為朝廷畫此計者國家事去矣伏讀大疏論北邊屯墾文尾似亦隱含此意自係與聞密計竊以為此舉果成顛隲翹足可待也某跼伏草野不敢妄測廟謀惟於平生故舊未敢恕置嘿已南中近刻成五周先生集欲與五竇聯珠後先輝映五集之中昀師詞學及李況先生五言律詩尤為必傳之文章憎命先師既失路於粵西李公又誣誤於閩海家業凋零子弟微弱李公老而無歸將依愛女以終老而閩中舊事復發坐贓被逮急追逋負聞其獄事本冤既奏當定讞今已無可置辨但以廿餘年舊案又經奉 旨原宥謂無侵蝕情事徒以未能核實勒令清繳又迭經 恩詔與豁免條例相符李

公年近古稀無子無孫羈繫閩省行見幽憂以死某身居下流無能為役欲望大雲遠被憐先師人亡家破僅孑然愁留愛弟仍不免刑網橫加至可哀痛可否致書閩帥開一面之網矜卹窮儒奏結前事俾獲赦原此上策也萬一大吏礙難平反亦求稍與寬假或令取保就醫以不了為了亦可銜結為報總之大吏若肯矜全不患無詞寬貸茲將季公坐買蚊船虧累元案本末抄摺奉呈并附呈五周先生集一冊伏乞惠覽昔敝友坐一寃獄桐城縣令已鍛鍊定罪某自深州緘寄此友所著詩稿四冊曾文正立飭平反其獄今又妄干執事欲再邀曾文正之惠惶悚無已不宣

與福建李勉林廉訪

閏月十九日

遠違光霽倏忽三年承聞涖政閩中吏風丕變時事日棘尤重本圖曷任忤慶渤碣之間風雲變色事勢相激未測所極安得正人

得位盡如閩疆哉季方伯北地舊僚情好素篤南轅驟靳亮能相
與有成尤跂頌也某自我公榮遷後鬱鬱久居杜門謝客校閱課
藝之暇時復以師友文字自娛近抄錄曾文正公所選四象古文
此書輯文正日記者皆未及見故麻數公生平著述不及是編前
年在都下親訪之重伯編修亦茫乎未有聞也某往時抄有目錄
恐久且散失今照錄寫定將付石印以廣其傳南中近刻成五周
先生集今呈上一冊五周先生者敝師昀叔先生昆仲合集也先
生為文正公高第弟子庚戌朝考以山虛水深命題文正公擊賞
先生試帖二句云鶴舞空崖月龍吟大海潮以為此真詩人之作
拔置第一歸告龐省三龐時在公邸教授與先生為同年聞而走
告先師及揭曉都下輿傳此事以為藝林佳話先師在翰林臺諫
數十年聲名大振周荇農先生以才自詡獨心折昀師今遺稿零

落存者泰山豪芒耳其季弟季况先生五言詩尤妙絕時人殆是
必傳之作今聞以蚊船虧累舊案羈繫在閩某不揣冒昧欲求執
事解網施仁使孤窮蒙澤感同身受某未深悉季况獲咎本末惟
聞事在廿年前曾經奉 旨原宥謂無侵蝕情事徒以未能核實
勒令清繳又迭經 恩詔與豁免條例相符夫以讀書士人與市
僧交易其未能核實自在情理之中今年垂七旬無子無孫孑然
一老家破人亡有一女遠隔江介此真天下窮民也仁人君子可
無一援手而出之水火之中使得寬然自遂於化日光天之下乎
昔某在深州時桐城有儒生陷獄某函封此生詩稿送呈文正公
文正公立飭皖中平反出獄今於季况之事不能不以文正舊德
望之我公乞加矜閔財幸為荷

與福建季士周方伯同

昨歲敬送旌麾倏忽遂逾旬月側聞春風和暢榮泣閩疆先公之
寄惠未亡人吏之迎觀猶昔比房氏之承太尉似蜀人之戴葛侯
遐邇謳吟威惠霑浹至慰私頌台端在此開辦學堂頃間業已落
成規模闢敞據一都之勝山長已延定沈子封編修此月可到畿
輔首善為他行省開倡風氣邦人頌明德於不衰矣學堂以中學
為主中國頗不悅學遇有學者多無保全之惠閩中前廿年有蚊
船虧累之案案中周守星詒字季况者先師昀叔先生令弟也昀
叔先生為曾文正高第弟子兄弟皆有才名而先師尤愛季况某
乙丑徵倖時先生囑令遊閩一見季况某不果往後聞其有買蚊船
虧累之事後又聞奉 旨原宥謂無侵蝕情事然猶以不能核實
勒令清繳今事隔廿年迭經 恩赦季况既無侵蝕似是公罪今
孑然一老無子無孫年且七十無家可別止一女遠在如皋而季

翁負罪羈繫閩嶠少年時風流儒雅亦頗以才見重上官豈知窮老成一纍囚文章憎命至於如此中學培才正復何用某竊哀先師兄弟多才今皆老死僅存季况一人又負罪嶂鄉不揣冒昧欲求執事憫其奇窮核其獄詞能否解一面之網言之大府准予奏結此案俾獲赦原周氏諸才鬼必皆銜結為報萬一礙難奏結亦乞准令取保就醫是為至懇昔某有友陷於冤獄赭衣就逮某以其詩稿封送曾文正公公檄皖吏立予平反今埵呈五周先生集一冊亦欲明公再施曾文正之德感且不朽冒瀆死罪不宣

與廉惠卿

四月四日

奉煩代校元刻荆公集始終未見俯允至為懸懸聞甥閉門讀涑水書涑水書不如荆公集遠甚世人右馬而抑王皆目論也執事若肯校王集於所學決有新獲所謂渠成亦秦利也

答李季高 四月六日

董軍調入畿甸直督為主糧臺當年內地用兵無此辦法董軍專練白蠟杆人有諷令用新式槍礮者輒瞪目罵曰吾以此物平回何物外國豈能過於回逆哉政府倚任此軍真來書所謂酣睡不醒了不知目今五洲是何世界此最可慟外議嘖嘖謂董軍將為西狩護蹕之用恐亦揣測之過 乘輿一動畿輔非我有也國不能自立亦何地可逃威乎畿輔新立學堂由當道諸公自謀之頃見定章以中學為主中學又以理學為主延沈子封編修為院長亦是師相幕客其議論頗近清流昨已開考取四十人入堂教習耳目間新事如此

與賀松坡

同日

湘帆示文數首筆力勁悍學韓有得來書屢稱其可畏自非妄歎

四象古文選本曾文正自謂文過高古當時侍側未及請教如羽獵長楊報孫會宗書在氣勢上編子虛上林報任安書反在氣勢下編頗不解其意文正殆謂子雲純陽兩司馬兼有陰柔之美乎執事倘得其旨亦望示我

答柯鳳孫

同日

海靖飛電賠修孔子像我以為大事彼視此等至輕又可藉收士心何憚不為吾以為自膠澳奉讓東省路工鑛務盡歸德人精華已入彼手山東非我有矣區區一偶像何關得失但東撫謂無其事究竟是非豈可倒亂如此得無傳聞果失實乎國家長此不變夢夢如昔天下將裂豈惟山東吾等皆不知終歸何所矣

與閻鶴泉

四月十七日

時局益壞恐遂為波蘭印度之續士大夫相見空作楚囚對泣狀

南海康梁之徒日號泣於市均之無益也唯亟派畝捐立縣鄉學堂庶冀十年五年人才漸起乎無人才則無中國矣不具

與李季高 五月十五

近日朝局一變使人目眩神驚韓公云不善為斲血指汗顏巧匠旁觀縮手袖間古今一律端午 詔書竟廢去時文不用可謂大

快某竊有過慮以為舍時文而用策論策論之不足得人仍恐不如時文以其茫無畔岸人競抄襲而考官皆時文出身不能辨策論高下宋世本號策論為時文策論敝極乃改用經義今復策論不過一二年其弊已不可究詰矣弟素主持廢時文者至廢時文而用策論則私心又不謂然正如陸放翁一生不主和議至韓侂胄北伐則放翁又深議其非此未可以皮相論也今朝臣寡學彼既不能知時文之佳惡又烏能以策論取人竊謂廢去時文直應

廢去科舉不復以文字取士舉世大興西學專用西人為師即由學校考取高才舉而用之庶不致魚龍混雜西學未興之前中國文學亦由學校選取似較用無識考官決得失於俄頃為稍愈然此亦恐學校之師未能盡如人意是故此事未易得手言之甚易行之實難今一旦張下新詔得失固應參半耳

與周玉山廉訪

五月十六日

朝局倏忽一變國師黜黜南歸然此三年中所失不小以三尺法論之似仍是情重罰輕不足相抵惜人才希少繼之者未必勝之鄭五作相時事可知顧念時危惻然心悸端節詔書徑廢時文五百年舊習一旦廓清為之一快但舍時文而用策論知二五而不知十策論不足取才與時文等耳以時文出身之考官驟而使校閱策論彼安能定其高下佳惡雖經濟科常科亦恐無益處狙

公賦茅朝三怒而暮四喜良可憫也某前承優禮後來相循不改近則試事改絃竊恐此雞肋終當棄去矣抑國勢倘遂不振則黃炎苗裔同歸於盡士農工賈一邱之貉豈獨下走張張無之哉

與李季高

五月十八日

壽州孫相國主持大學堂最為幸事

詔中言采取西國學堂條

規此最扼要中國人好自是不肯取資西國多以已意別立新章

西人嘗論其失有云章程不善總辦雖得人不能善也總辦不得

人章程雖善亦無益此二語最中肯綮日本初開學堂遣使赴歐

美徧訪學堂章程歸而折中之仍復屢興屢廢屢成屢改然後乃

能合法今若名為採用西人學校章程實則仍是以已意為主此

必無效又詔中有所謂總教習者須兼通中西之才此等人目

前無有若必求其人必至魚目充珍珠且此等議論必謂以中學

為主主中學勢必不能更深入西學若深入西學亦決不能再精
中學既不能兼長何能立之分教習之上而美其名為總教習哉
鄙意不立總教習中國之學亦在分教習之列庶使眾教習相安
無事不致相形見絀望轉達師相與孫相熟商為要

與南鄉紳士李與仙柏松如 五月廿六日

科舉改制 國家注意西學策論取士亦決不能久昨讀 上諭
天下書院盡改為學堂民間社學義塾一律講習西學風氣大變
吾皖尚沾沾守舊不能作新人才此大患也智者謀事當先機獨
斷若至眾人同見則已措手不及今天下已汲汲謀新豈可默守
故見竊聞白鶴峯書院兩兄主持經理其新生小洲日有增益計
歲入當不下四百金今擬遵照 廷旨改為學堂專講西學以應
國家之求此區區入款若延請西師萬不敷用若儘此四百金